

卷之四

述懷紀畧序



嚴子旣錄述懷紀畧喟然曰嗚呼予年未四十師友親故之間所凋零泯滅一瞬而萬世不視者遂已若此矣且又有別著于他文與雖友善非尊且親及夫風雨晦暝有燈窓之雅者槩勿錄焉噫何其速疾也古人云生死亦大矣間撰述其大畧思其色宛然其聲音煥煥然也况于中有高躅大業並雲漢崧高昭回千萬歲者乎而其間或才之未茂或業之未美幸而茂美矣或卒然而萎折及其他隱約老死于載籍中與夫英豪凌厲聲未施于時書不垂于

後忽焉與弱露輕塵飄風墜雨同歸于隕落者彌望而是也如然則天之生夫人既予之以嘉材不少摧挫之又壽考其年使德立于身可法傳于世者蓋古以來僅有也幸一日未死其可弗思夙興夜寐求古聖哲之道師之學之閔閔然農夫之望歲已乎予所爲既痛逝者忍心瞿于日邁月征職此故歟蓋昔者子在川上曰逝者如斯夫感學也易曰或躍在淵無咎言學欲及時也詩曰樂只君子萬壽無期言學成而令聞不已也尙其乾乾不息矣哉己丑四月望日題

紀畧一

先師汪文烈公

諱偉字叔度號長源金陵人

自幼氣義焯焯孝友無間

言戊辰第進士授慈谿令以廉惠聞丁丑擢翰林院簡討屬流賊橫行江淮間上書陳方略侃侃不報甲申三月十九日都城陷公肅冠帶大書五十字于壁間公繼室耿夫人亦服其命服同時投緹以歿公時五十二歲耿夫人二十四歲公神儀明秀朗目疎眉平居意思灑然如在事外自爲諸生貧苦逮其通顯未嘗有憂戚凝滯之色其爲政專以德化民令慈時屬有海警臺使者檄保甲團練甚急公曰是徒擾吾

民不爲理使者不悅詰責之公曰公謂慈令不奉法耶奉公法莫如慈令令已練其氣不潰散保其心固于山谿矣奚文具爲使者云卽如子言其法奚若公曰簡訟獄斥羨餘勸農功威遊惰而已使者嘿然已而曰令言是其在史館憤當事者不忠時時撫膺太息思請纓自効其論將來事無一語不切中如符節史相國之在南樞也甲申正月西事迫廷議移史公西公昌言曰茫茫河南北數千里行見諸公拱手授賊所冀者江南片土庶幾復振徒以史公在耳諸公何好于賊必欲并此揖讓之耶且史公卽西一

事勢有及否時部大臣以下皆股慄不敢發一語夫史公得專一保釐南都國脉中絕復續者公奮身昌言之力也公又深湛于學閱古籍一覽輒盡刪正可數千卷尤好陶杜詩謂近道好三蘇文謂近自然至濂雒家言則觀玩不釋手下筆頃刻萬言必于君國世風有裨然往往隨手散去不留槁憶慈湖待坐公語予曰夫人必無僞也斯有體必無滯也斯有用去僞在于寡欲化滯在于讀書又云曩讀魯論于孔曾一貫處耿耿不得于心一日誦戴記至灌官不敬非孝也戰陳不勇非孝也豁然有省自此縱觀聖

人賢人之書洋洋乎六通四闢也嗚呼人知公大節正氣
皜皜乎嚴霜烈日矣抑知其實自弄月吟風淵泉時出若
此者歟後死者其將如之何緝熙于光明也悲夫公癸未

較士南宮顧子漢若

諱咸正
崑山人

孟子綱宜

諱明輔
北直人

溫子寶忠

諱璜烏程人其卷在給諫吳
公房已被黜公力贊得雋

俱在選孟子任行人同死甲

申之難顧子宰錢塘有善政屬武林失事死之溫子即予

妻族兄平時端亮尚風節刻苦于學問為徽州司理堅守

五六月比陷與其妻茅孺人及其女從容自刎死

胡太史公

諱守恒號吉雲戊
辰進士舒城人

風度端和詩文卓犖有奇氣

初授吾湖司理尚惇大端務興起斯文士民戴之如冬日

之日予特試童子科弘獎踰涯有國士之感乙亥召拜翰

林院編修崇禎朝用外吏值史館實自公始辛巳省親歸

明年舒城陷賊素仰公名欲尊禮為民望公嫂罵曰汝等

非朝廷百姓耶其敢無禮于貴官方是時公目如炬舌如

電竟死之

時年四
十九歲

紀畧二

叔祖存涵公

諱錫曾祖贈刑部公次子庠生

醇厚有德少為文精麗年二十餘得奇疾忽不能坐起垂三十年勿瘳日卧一榻取詩書左史文選觀玩之教其子博稽逸覽發聞于時晚尤醉心釋典怡怡然不知疾痛之在其體也

庚辰七月廿九日生乙亥十一月十三日卒壽五十六歲

叔祖惺菴公

諱鉅曾祖贈刑部公第三子

英直喜立事人有過面數之必盡其剛方之氣至今人思而敬之然公歿時予尚少不能詳其風槩矣

甲申七月廿四日生丁卯六月十九卒壽四十四歲

叔父仲玉公

諱璋太學生

貞夷溫粹以孝謹稱為文雍裕有大

雅之度在庠序有聲已入國學屢屢幾得之卒不售然公

益孜孜發憤于業竟以勤瘁不起公恭儉好學與人交誠

壹無間人謂公必顯必壽而竟止于此天其可問耶公有

至性其于予甚恩憶癸未冬予下第還見公于里山下公

視予顏色有若憂憫者執予手曰無鬱鬱語未已公淚下

不已後數日予遂有採藥之遊瘴雨蠻烟數瀕死亡明年

八月始返于金陵予時病未能歸馳書復大父及大人并

有書致公謂相見且有日嗚呼豈意先一月公已遷化里

山一哭聲容遂成窈絕也

乙巳二月十一日生甲申七月二十日卒壽四十歲

叔父草菴公

諱璜邑諸生

少負英絕之韻為時文沉鬱有氣比

長博綜典籍百家之言思以著撰傳世行遠其古文詞如

飛瀑布岩一瀉千尺詩以聲情為主清壯頓挫不為中晚

蕭颯之音詩餘亦婉麗自賞登高臨水對月當花申懷感

興灑翰如飛飄飄然有古才子之風乙亥春忽聞蒼卞有

大宗師亟往從之閱七晝夜大省悟機穎雷砒雨激嗣是

脫枝落英散斥家財供雲水周寒餓結菴霞霧山中幽居

簡出揮塵嘯歌夷澹自樂也于前則子昂太白于後則無

遷山集 卷十
垢大年其于學于道豈非變化日新者乎乃遽徂謝不盡
如所期傷哉公臨歿悔平時情想未斷不能深造如古人
遺命焚所著書有來問者必顧語曰各敬而上儀抑亦坦
然生死之際矣公初與予約為古學慨焉志在千秋其事
詳載他文故不盡述
丁未五月廿三日生巳卯
七月七日卒壽三十三歲

紀畧三

仲津先生 諱潤予之從叔父邑諸生 平易善自守為文夷暢不事鈎

棘予六歲時教予誦千家詩辨四聲及六書八體予時曾
甚殊不能省也 癸酉卒壽四十三歲

葉先生 諱萬榮慈谿人 嘗館于菁山予八歲時學于菁山范姑家
先生教授論語孟子句讀和厚而節制去之日予與范家

第泣涕牽衣挽留之時已七十餘後十三年予謁文烈公
于慈湖遍訪先生居處暨嗣人杳不可得

吳先生 諱椿號瑞林錢塘人 繼葉師授予易經及莊左秦漢古文整

密有序予少所授書至今頗記憶先王之賜也然特夷簡好聲樂課畢則飲酒吹簫笛自如人初以爲異已而知其長者且善教事乃咸重之

辛未卒壽五十九歲

沈先生

諱汝霖號涵白烏程諸生

能文有行大人令海門時延爲記室

予亦時從質問古文竒字先生博于書尤熟時事嘗憶其燕坐水亭譚說嘉隆以來朝章建置人物盛衰及其他縱橫浩渺之言纏纏不可竭也

丙寅卒壽六十三歲

聞之父老曰雙谿之嚴與石溪同源然枝派遼遠不可考

自冷然先生

諱御風字廣輿

與大人交最深始定爲兄弟行繼此

以爲序云先生才性寬深慎然諾取與動必師古不屑世俗繩尺于書無不讀自經史註疏至百家之說六官庶司之典守悉精考有得爲制義若古文詞雄高自恣然一衷于左史其遇事灑灑斷決如流水也崇禎中詔舉天下方良之士大人時爲嶺東亟疏公才德表焯者十餘事上之又爲當事者沮抑強授溧陽丞先生坦坦爲之踰年績大著擢池州判復自池州遷福州丞歷汀漳二郡守已復備兵江右以憂歸所至惠聲藹蔚又當岩險倉卒萬變公不露聲色隨事勢規畫之無不屹然底定其持守又極潔清

比歸蔬食敝衣如寒素歿之日至不能殮嗚呼其可敬也
已方先生蚤負盛名以興起後學爲事與學者言必先立
乎其大雖以予之不類顧自惟涉世以來似有毫髮不同
于俗者實自十四歲從公講說論語左傳時稍稍見公弘
濶之意雖未覩大全譬如吸勺水于長川于以洒濯滋漑
未可云全無益也况挹其洪濤汪洋萬頃者乎

戊子六月
卒壽六十

五歲

閔先生

諱儀德號厚弘予
之母舅烏程諸生

敦厚沉默守古法寡言笑尚務

記覽爲詞章若恒閉一室取經史子集遍讀之已又摘其

精粹者手錄至三千餘卷然止用以爲時文資其時文窮
工盡致每三年輒變其音節以冀一當雖六十猶有精悍
之色如廉將軍躍馬顧盼示可用也然終抑鬱以歿平生
文百千篇亦皆零落無存獨其數十年篤學嗜古之意耿

耿如在也

丁丑七月卒
壽六十四歲

紀畧四

孫太翁

諱鴻湛號祖溪予祖母為太翁長女

性剛直其行事無不可告人者

好集醫書有見即欣然手抄之已為人取去亦不顧問于

所知無問戚疎貴賤聞有小疾痛即挾所手抄書走視之

其治症多奇效或酬以金帛則大笑棄去晚家霽山之麓

方春遊觀殊甚翁蒼顏白髮携杖逍遙于其中或偶覩治

容麗服則大喜賦詩而歸比歸人或就問其所為詩則曰

已忘之矣嘗聞古至人如嬰兒翁其嬰兒乎

庚午卒壽八十五歲配

某孺人歿已久予不能詳其淑德矣

閔外祖翁

諱世躍號龍淵世居烏程晟溪先妣為翁少女

天懷慈憐遇人一以惠

人皆樂之以胄監仕為上林丞非其好也歸而簾閣據几

不以事自累庭前雜植海棠芙蓉水一盆畜金魚數尾蕭

蕭閒雅好觀傳記小說聽音樂為娛適自少至耄老若不

知有憤鬱者殆列禦寇莊周等所為近于道者歟辛未卒壽八十

五歲配徐安人端靖儉素有德儀綜理家法甚整以輯先翁

十四年卒

戊午卒壽六十三

卒後家始稍替然翁陶陶然不為意

也

孫翁

諱懋棟號若冲孫太翁長子

古樸不似今世人最精于農桑予嘗

欲從公口授著農經一卷會公卒不果翁拮据為生不輕

使一錢將歿忽盡出所有散之名山古刹人咸以為達

丁亥

卒壽八十一

子恭先

諱謙諸生

亦侷儻思以文自立惜不竟卒

范翁

諱廷臣號念祖居烏程菁山為予姑之夫

天分敏妙少習舉業斐然然樂

舒散不欲以文事自苦書翰奕棋翩翩閒澹也其志行特

挺直重根本教其子業成與當世聞人相上下予八九歲

時翁挈予過其家飲食誥教之一如其子記一日值公懸

弧之晨予出拜公見公疏衣麻鞋獨立于庭予驚問故公

愀然曰吾于是日生生頃之吾母遽謝世其孺性如此予

在翁家先後四歲比大人第進士始歸歸之日翁呼予云
務自立父公卿子流落者多矣予既歸恒憶翁與予姑不

去于懷至于今時時夢至琬琰堂翁家堂名折紫竹立玉蘭樹

下翁家紫竹玉蘭特盛望曉山如翠也翁壬午三月卒壽五十一歲

閔上林翁生七子長舅即厚弘公別有紀二舅曰起仲公

諱偉德諸生己卯卒壽六十四果毅有機畧詩文豪蕩自善四舅曰

公諱篤厚可親信五舅曰日斯公諱邁德諸生乙亥卒壽五

四溫雅日誦萬言為文波瀾滾滾晚讀內典益深湛六舅

曰公諱德柔和不戾于俗自乙亥以來五六

年間五舅遂先後徂謝憶予小時予母携予過外祖家諸

舅咸英然少壯見予來歡甚爭取餅菓啖予或手抱持之

予母則密誡予勿多食勿讙笑勿與表兄姊鬪詈嗚呼昨

日耳

溫外翁諱子正號涵所國學生居烏程七里村予妻為翁少女也少讀書工文連試不

售乃罷去為人和厚而端無機事善自忍下好積古墳策

興至抽一卷朗朗誦之遇忠孝節俠可慕樂之事則大叫

呼稱善出逢田夫負販諄諄告之或不省竟去翁弗厭也

己巳卒壽七十元配皇甫氏蚤歿予妻亦不及見故不具著

施外翁

諱標號源寧居邑之璉市予妻為公次女

萬曆庚戌進士宰順德寬厚

有德澤擢御史中立無倚凡所條奏務持大體不以博擊

樹風聲予乙亥夏見翁于邑館氣象雍厚于稠人中獨藹

藹與予言且云曩見子文有古風可嘉予時殊感之後三

年公歿

庚辰卒壽六十八歲

又數年予不意遂為公壻予妻嘗為予

言翁器量弘遠喜愠不著于面教子女必以古懿訓云配

潘安人

丁亥七月卒壽七十一

最慈順有樛木之德子女六人俱非

安人出豈惟安人忘之子女亦忘之家之人亦忘之予在

甥館數歲忽忽似予妻為安人親生也

紀畧五

瓊甫叔

諱 玳邑諸生 丁卯戊辰同學

簡拙無適俗韻其為文良苦昔人

評離騷經謂若渾金璞玉泥沙掩匿而不得用明星皓月

雲霧蒙蔽而不得出叔殊似之

壬午卒壽四十一

其考曰振吾公

諱銳甲戌偕入都 辛巳卒壽七十三

性剛勁所至人畏伏如

嚴師

淳之叔

諱澁烏程諸生戊寅春與予同居東臯已卯春同居芥山

靜深有本刻工舉子

業華實彬彬試輒冠其曹庚午主司大嘉賞已登序矣以

他故抑置副車人咸惜之中歲忽放浪山巔水湄精禪悅

澹嗜慮奉身如浮屠如是數年乃卒

辛巳卒壽三十七

其詩學韋

柳書尤逸勁有絕似祝枝山者

雙溪先生有弟曰和叔

諱諸生巳巳同學壬午卒

娟好靜秀侄日子

震

諱巳巳卒

渺渺有遠神子日子靜

諱甲定諸生辛未同學乙酉卒爽

達于事理然不幸俱蚤夭間總集其遺文止三四篇耳已

自楚楚足傳其風致一幹之蘭芳香出林豈莽灌幽翳能

限斷哉

閱自求

諱有綸厚弘公長子吳江諸生巳巳辛未同學

溶溶英英有駘蕩遊夷之

思文與人皆然

庚辰卒壽四十一

其同堂弟曰退之

諱廷甲丁五同事辛巳卒

壽三十八

亦工文齋素自好温温有義氣俱不壽何也

紀畧六

莊漢曉

名元辰
鄞縣人

與予同出文烈之門有古風義為文晁醇

雅丁丑成進士予採藥過金陵君適為太常博士甚欵欵

且贈予以格言予賦三詩謝之君居官清端無倚附嘗集

儒生百十人于太常署中擁臯比講理性之學其大致可

見矣後歸鄞屬江東失守遯四明山中居數月以病卒

俞浸天

諱流錢
塘人

亦文烈門人文烈于諸及門士最喜予與

浸天謂予似韓昌黎浸天似孔北海四方同人司選政者

亦亟稱予兩人有一門雙璧之譽而予兩人簡素自好頗

相類又年俱少故相知最深然浸天神行電逝之才汪如
長江峻如巨嶽飄忽若駛風之嘯六合所謂賜也何敢望
回予其可以雁行進也叢蘭早折戊寅絕二惋悵何如
慎克修名思永歸安人丁亥卒沈襄哉名懋正德清人戊寅卒胡健甫名象乾烏程人
丙戌皆予同郡齊年友也克修瀟洒有逸興襄哉端潔和
惠一望可儀健甫通敏于才藝其文皆清贍適于用數年
間咸已凋謝又不及顯著克修雖成進士為粵令亦遽遭
謫詠其可悼也已

紀略七

沈太姑高祖贈刑部公少女適同邑沈太翁名輔字翁歿時太姑甫

十七歲家甚寒苦雖饘粥不繼太姑安安中道育遺腹子

至于婚冠又天有一孫教之成立居恒并日而食端坐一

室中雖耄老子第罕見其面或稱其苦節則面發赤不能

出一語再問之則曰不如是汝將何為耶君子曰詩云不

識不知順帝之則斯之謂歟蓋霜風冰雪之詞至于此而

亦有所不敢加矣壽八十二歲卒在庚午歲後三年大人奏記

學使者錄其孫或為博士弟子云

鄭祖姑曾祖贈刑部公少女適同郡鄭翁名天來號翁慧而軼自結諸生

襁後遂有終風之感然愉愉無少怨愠意年二十餘翁歿

歷試諸艱育其子成人長齋繡佛比卒不懈穆如也秩如

也乙酉卒壽五十餘歲

先祖妣孫安人之妹曰吳太母安人蚤歿大人方幼太母

善視之後大人宦遊海陵廬陽迎太母以往太母溫厚善

開釋人意在予家裨益為多予少時多病太母往往輟寢

食調治之初吳翁豪于貲稍從狹斜遊耗盡且無子晚始

自悔以家事屬太母太母為納一姬舉子已又經緯其業

致千金畀付焉予不及見孫安人大人嘗言太母舉止微

似孫安人比卒大人率予過歛所哭之慟已卯卒壽六十餘歲

谷風之詩曰就其深矣方之舟之就其淺矣泳之遊之何

有何無黽勉求之凡民有喪匍匐救之言女德與才竝懋

也閔母吳孺人有焉先安人同堂弟孺人晁淑慎與先安吉甫公元配

人至親好治家內外蘄蘄于姻戚恩意曲至有急難百方

拯濟如勿逮以先安人故視予如子諸所彌縫匡救甚委

折噫其視詩所稱有聞然否歟而孺人每見予值險厄則

必曰吾觀子警之金方在爐吾甚喜雖然子亦憂金非純

金耳無苦爐也嗚呼此豈閨閣中語哉孺人少艱于嗣側
 室有子酷愛之無何子死日號泣呼天呼祖宗悲感不自
 勝如是數月卒丙戌十月卒 壽五十一歲悲夫天喪予母又喪覆露予
 猶母者痛可言耶

第三姑適茅公永叔

名胤 居邑之
花林村諸生

靜慧温簡嘗侍丘夫

人言禪一夕遽通其旨既歸茅氏恒鬱鬱不樂病且卒

癸未

二月僅三十歲

丘夫人先至其家予隨大人暨諸父往哭哭已丘

夫人泣語予曰頃見茅氏諸內戚云居常問汝母子汝姑

汝姑云此豈但賢者吾意其為聖也予不覺失聲哭歸與

先安人言之又哭嗚呼若姑者可謂明鑑卓識歟又聞姑
 臨終時顧永叔公曰免禍耳餘無可言者後數年永叔公
 以豪俠故竟死于盜

紀畧八

惋靖惋順皆予同母妹也惋靖端重外簡而中敏年十八

丙寅四月生

適姚子集生二十二歲卒

丁亥六月

無子惋順柔嘉處

上下盡其宜年十七

丁卯六月生

適徐子素素二十歲卒

丙戌四月

臨卒神爽烺烺有一子踰月亦死其兄逸山子哀其德足

稱述又夭折可憫故謚之然不敢純用古謚法語故叅取

其文曰惋靖惋順云或曰私謚禮歟嚴子法然曰非也予

兩妹自幼閒靜婉婉守先安人訓飭授孝經列女傳通大

義又皆孝慎其澹約先安人時或抑鬱卽悲慘不食及至

安人所又歡語如常自安人歿予見予妹即安人聲響依然也嗚呼尚忍言耶蓋予同母弟妹八人至于今惟予與閔家妹在耳予憂患蚤衰閔家妹又柔悴善病亦豈蒼蒼松柏耶予每過閔家對吾妹述安人在日群兒遶膝時事簌簌泣下也昔子路有姊之喪可以除之矣而勿除也曰我寡兄弟而弗忍也夫踰服非禮也乃予不曰非禮也第云先生制禮行道之人皆弗忍也蓋亦悲其意而陰許之矣然則予于予妹衷于義而謚之即于禮不盡合固其志有足哀者且其文又未嘗純用古謚法語其誰曰不可也

悲夫前此有三妹一甲寅生二歲天一乙卯生三歲天一辛酉生一歲天予時尚幼不盡記憶嘗見先安人說第二妹聰穎殊絕云又有弟胤嘉小名阿金慧妙甚四歲能誦唐詩百餘首五歲以痘殤

丙子十一月

使在于今英英磊磊矣

惜哉

女日申

壬申九月生

日酉

癸酉六月生

日卯

巳卯十月生

戊寅十月天 皆予女先後殤折初酉兒死時予為文以哭之日予生二

十有二年而有汝汝生三年而遽死若論先後之定禮固應予死而後及于汝何為乎凌次而奪汝于穉予哀汝之

云亡因嘆斯形之不可以久處其將一笠一瓢澹澹乎蒼
 翠之峰葭霜之泚嗚呼汝則死矣乃能動汝父之遐心而
 箴之以知止哀哉吾女可稱孝子後兩兒不及為文然同
 此懷傷故錄其詞云云申兒生母張氏亦蚤亡丁丑四月頗柔
 靜遵禮度先安人及溫純懷亡妻之謚嘗感悼之

紀畧九諸君生卒年歲俱不能詳

王君虛谷名餘姚人葬孫安人時地師明于地理性迂廓自儕景

純淳風高冠大袖峩峩而來望之輒可笑或與燕會則一
 坐指目之伺其顏色聲口以資談譎君嶷然端坐執盃持

梁飲啜自若也時又有孫君西溪徽人戊午葬贈刑部公時地師陳君三

霽餘姚人戊寅迂葬孫安人時地師及倪君寄生烏程人俱精堪輿家言倪

君有道氣然不能如王君渾渾絕瑕謫矣

叅霞道人姓山名立字子一自稱南岳人丁丑識之嶇峭不同俗壯年仕為叅

佐能以直道自處已去從方外遊予嘗訪之湖中時新雨

晚晴同立鍾閣上眺望南北烟嵐如沐道人忽云予有事

遽起走入亂山中不知所往

崔誠之名自成烏程人庚午在南署辛壬在廬署詩婉約予序之韓景谷名夢鯉烏

程人癸亥詩拙而野人亦方朴沈夷則名元鏡邑人乙丙在粵署詩晁

多亦嘗求予作序其間頗有沈雄之韻足採取者

徐完懿先生外祖母徐安人之侄名芳吳江人和愷薦行甲申卒壽七十三其子

曰野字蘊卿丙戌卒年三十四從予遊致志于儒學美哉未可量也竟

天死予甚悼之語具本傳中



道